

XXXVII.

Lettre de Guillaume de Nassau aux États de Flandre.

— Il leur donne communication d'un rapport qui lui est adressé par les Magistrats du Franc de Bruges sur ce qui s'est passé au village et au château de Handtzaeme entre les habitans et les Wallons du baron de Montigny. (Arch. Y.)

1578
22 Decemb. Messieurs. Je vous envoie un petit discours de ce qui est advenu au chasteau de Handtzaeme par le quel vous entendrez que les Wallons (ores qu'ils disent estre venus en flandres pour faire la guerre aux gantois) toutesfois vont devastant universelement toute la flandre, et même ce nonobstant les termes d'accord sur lesquels on est, qu'ils poursuivent tousjours et continuent actes d'hostilite come aussy ceulx de Courtray me mandent à toutes heures qu'ils font le semblable jusques aux villaiges plus proches du d^t Courtray. Pourtant je vous prie de le remonstrer a Messieurs de Montigny et de Herze et les prier de contenter leurs soldats pendant qu'on est en traicte, et en oultre qu'ils deschargent le quartier d'Ypres et du Francq de leurs gens de guerre aultrement ils donneront a cognoistre que le fait de Gand ne leur serviroit que de pretexte et qu'à la verité ils en veulent a tout le pays de Flandres, et sur ce apres m'estre affectueusement recomande a vos bonnes graces je prierai Dieu vous donner

Messieurs, en bien parfaicte sante heureuse et longue vie.
De Gand le 22 de Decembre 1578.

Je vous prie Messieurs de comuniquer ceste avecq l'information a Messieurs de Willermal et de Bours et en adviser par ensamble comme trouverez le mieulx convenir.

Vre bien bon amy a vous faire service

GUILL DE NASSAU.

A Messieurs

Messieurs les Deputez des trois membres de Flandre.